



FONO AOAQ FAITULAFONO
LEGISLATIVE ASSEMBLY OF SAMOA

Lipoti a le Komiti o Oloa Gaosi Tulaga
Muamua, Mataupu Tau Pisinisi,
Alamanuia ma Leipa

i le

P.P. 2015/2016 Nu. 25

Lipoti Faaletausaga Iona 51 a le
Faalapotopotoga o Esetete Tausi a Samoa
mo le tausaga faaiuina aso 30 Iuni 2013.

(Tuuina atu i le Fono Aoaq Faitulafono)

E fautuaina e le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa le Fono Aoaofaitulafono ina ia faautagia lana Lipoti.

1. IUGAFONO:

I le maea ai o iloiloga a le Komiti na faaiugafonoina ai e fautuaina le Fono Aoaofaitulafono ina ia faamaonia:

- **P.P.2015/2016 Nu.29, Lipoti Faaletausaga lona 51 a le Faalapotopotoga o Esetete Tausi a Samoa mo le tausaga faaletupe na faaiuina Aso 30 Iuni 2013, faatasi ai ma**
- **Fautuaga a le Komiti ua tuuina atu i lalo.**

2. FAUTUAGA

I le maea ai o ana iloiloga, e fautuaina e le Komiti le Malo ina ia:

1. **Silasila le Faalapotopotoga i le tulaga o le toe iloilo ina o tuutuuga ma aiaiga o le faamatuuina atu o ona fanua mo le lisiina e le aufaipisinisi ma afioaga ina ia faatulagaina ai se taimi talafeagai mo le aoina o aitalafu tuua e pei ona faamauina. E manatu le Komiti o sea faiga o le a fesoasoani tele i le faaititia ai o aitalafu tuua i le lisiina o fanua ae o le a fesoasoani foi mo ana tupe maua i le lumanai aua lona toe tau atinaeina.**
2. **Ia uunaia le galulue soosootauau ai o le Faalapotopotoga ma nisi o Matagaluega ma Faalapotopotoga a le Malo i le sailia ai o poloketi talafeagai e mafai ona faaogaina ai nisi o eleele o lo o mafai ona lisiina atu e le Faalapotopotoga.**
3. **Silasila le malo pe le ua alagataua ona lisiina umia saoloto fanua e pei ona faatalosagaina e le afioaga o Fuailoalo ma Satuimalufilufi. E manatu le Komiti o se fofo talafeagai lea mo leni mataupu ua leva tausaga o taumafai mai ma o se tulaga e ao ona toe silasila iai le malo ona e le gata mo le atinaeina o ia tagatanuu ae faapea foi i le tulaga o le noatia ai o nisi fuafuaga a le faalapotopotoga o fuafuaina.**
4. **Silasila le faalapotopotoga i le tulaga o le faamatuuina atu o nisi ona fanua (3000 eka) mo le lisiina i se tau talafeagai aua le fesoasoani ai mo ana tupe maua. E talitonu le Komiti, o lo o lava ma totoe fanua a le faalapotopotoga e faatulagaina mo le lisiina atu i le aufaipisinisi, nuu ma afioaga faapea ma tagata taitoatasi aua le faaogaina. O le naunautaiga, ina ia maua ni tupe faaopopo mo le faalapotopotoga mo ana galuega faatino aemaise lona faagaioiga.**
5. **Silasila totoa le Malo i le amata lisiina atu o fanua o lo o fesagai ma le malaevaalele i Faleolo mo le amata atinaeina, ina ia ogatasi ma fuafuaga faataaitia mo le atinaeina o le malaevaalele faavaomalo i Faleolo, o le uafu i Mulifanua, ae faapea le taulaga. E talitonu le Komiti, o se tasi lea o alagatupe mautinoa mo le faalapotopotoga i le lumanai ae o se avanoa foi e le gata mo atinae o pisinisi ae faapea i avanoa faigaluega mo tagata o le atunuu.**

3. SAILIILIGA

O le Lipoti Faaletausaga a le Faalapotopotoga o Esetete Tausi a Samoa mo le Tausaga Faaletupe faaiiina aso 30 Iuni 2013, o lo o auiliili manino mai ai ana galuega faatino ma tulaga tau tupe ua maea ona sueina faa-suetusi.

3.1 Galuega Tuufaasolo:

1. Vaaiga Taulai:

Ia faatumauina le atina'e lelei o alaga'oa ina ia siitia tulaga tau tupe maua aemaise o aiaiga o tulaga manaomia mo le lelei atili o le auaunaga.

2. Manulauti:

O le faaoga lea o fanua i pisinisi ma atinae e mafai ona maua ai faamanuiga tau tupe.

3. Sini Autu:

O le sini autu o galuega tauave a le Faalapotopotoga o Esetete Tausi, o le taumafai lea ina ia faaogaina tatau fanua mo pisinisi ma atina'e, ina ia mafai ona maua ai faamanuiaga tau tupe mo le lumanai manuia o le Faalapotopotoga ma faasafua atu ai ia faamanuiaga mo le mamalu o le atunuu.

O se taumafaiga e toe lalaga atinae e pei ona galueaina ma faamanuiaina ai le Faalapotopotoga i tausaga ua mavae, o le faataua lea ua ave iai le faamuamua a le Pulega ua iai nei ma ua lilifa lava i le faaogaina o fanua mo le atinaeina tau faatoaga ma lafumanu, ese mai ai i isi fanua ua faamatuu atu mo tulaga faalisi.

3.2 Matafaioi Ausia:

AOTELEGA

1. Matafaioi Ausia mo le Tausaga Faaletupe o lo o iloiloina

O se tasi o faafitauli sa feagai pea ma le Faalapotopotoga i totonu o lenei tausaga o le soalaupuleina lea o le tulaga i fanua o lo o faaalua e le Afioaga o Satapuala i le latou mau o fanua e patino i le afioaga, ma sa aveesea faamalosi i le taimi o Siamani. Faailoa e le Faalapotopotoga le agaga faafetai ona o le mafai lea ona sologa lelei ma soalaupuleina lea mataupu, ma o le taimi nei o lo o talia se faaiuga mai le Kapeneta e tusa ai ma lipoti ua tauaaina mai i itu e lua e uiga i lea mataupu.

Faamauiina foi le faaauauina ai o atinae e pei o le toe totoina o meatoto e aofia ai le koko, kofe, niu, avoka, fa'i ma le talo e le Faalapotopotoga ma e tusa ma le 300 eka o le fanua ua maea ona faatoa i meatoto. Faailoa foi e le Faalapotopotoga le galulue soosoo tauau ai ma le Matagaluega o Pisinisi, Alamanuia ma Leipa i se tasi o poloketi aua lava le uunaia o oloa faatauina atu i fafo mo le atiaaina o le tamaoiga o le atunuu.

O lo o faagasolo foi le lisiina atu o fanua o le faalapotopotoga i Mulifanua i nuu tuaoi, aoga, faapea foi nisi matagaluega o le malo mo le faaogaina ma e oo mai i le faaiuga o le tausaga faaletupe o lo o iloiloina, e 385 eka ua maea ona lisiina atu ma ua maea foi ona sainia feagaiga o ia lisi.

2. Matafaioi Ausia mo le Tausaga o lo o lumanai

Faailoa e le faalapotopotoga le tulaga o lo o vaavaai iai mo le faaaogaina o le popo mo nisi alagatupe faaopopo mo le faalapotopotoga i le lumanai. O lo o faagasolo foi le tulimataia o nisi poloketi faaopopo e mafai ona faaaogaina ai eleele a le faalapotopotoga aua lava le tulaga i ana tupe maua i le lumanai ae faapea le atiaeina o le tamaoiga o le atunuu.

I le tulaga i fanua o lo o lisiina atu mo atinae, faailoa e le Faalapotopotoga e tele ni talosaga o lo o tuuina atu mo fanua a le Faalapotopotoga i Mulifanua aemaise fanua o lo o fesagai tonu ma le malaevaalele i Faleolo ma e iai le manatu maualuga o se tasi lea alagatupe o le a fesoasoani tele i le faalapotopotoga i tausaga o lumanai.

2.3 Tali atu i Manaoga:

1. Mulimulitaia o Tulafono

O le Faalapotopotoga o Esetete Tausi a Samoa o lo o faavaeina ma aiaia ana matafaioi ma galuega tauave i lalo o:

- Tulafono a le Faalapotopotoga o Esetete Tausi o Samoa 1977,
- Tulafono mo le Toe Faatulagaina o le Faalapotopotoga o le Esetete Tausi a Samoa 1990,
- Tulafono o Faalapotopotoga a le Malo (Faatinoga o Galuega ma le Mafai ona Tali Atu) 2001.
- Isi Faatonuga ma Faiga Faavae a le Malo e tauala atu i le Kapeneta.

O lo o mulimulitaia e le Faalapotopotoga aiaiga o Tulafono o lo o limataitaina ma faatonu folau ai ona tiute tauave.

2. Mulimulitaia o le Taiala mo le Atinae o Samoa 2012 - 2016

O lo o faamauina i totonu o le Taiala mo le Atinae o Samoa le auai ai o le Faalapotopotoga o Esetete Tausi o Samoa i le atinaeina o le tamaoiga o le atunuu e ala lea i le vaega o Tulafono ma Auaunaga Talafeagai mo Pisinisi. O le naunautaiga ina ia tuuina atu le lagolago i le faatinoina o pisinisi e ala lea i le iloiloina ma liliuina o Tulafono ina ia faigofie ona faatinoina pisinisi. Faamauina le amata faamamaluina ai o le Tulafono o le Faamauina o Pule o Fanua 2008 (Land Titles Registration Act 2008) ia Mati 2009 ina ia fesoasoani i le pulea lelei o le lisiina o Fanua o lo o faatinoina e le Faalapotopotoga o Esetete Tausi a Samoa, Matagaluega o Punaoa Faalenatura ma le Siosiomaga, ma le Faalapotopotoga o Eleele o Samoa.

3. Mulimulitaia o Vaega Tupe faatatauina mo le Tausaga iloiloina

Matauina e le Komiti e leai ni tupe faatatauina mo le faalapotopotoga e pei ona masani ai ae o lo o faamoemoe lava le faalapotopotoga i ana tupe maua mai i ana atinae ma oloa faatau atu faatasi ai ma fanua o lo o lisiina atu mo le faaaogaina e pisinisi, nuu, aoga ma poloketi eseese.

I le vaaiga aoatetele a le Komiti i le tausaga o lo o iloiloina, matauina ai le tulaga faaletonu o le tala i le tupe a le faalapotopotoga ona o le leai o ni tupe faasili o mafai ona mauaina i auunaga ma atinae o lo o faatinoina. Matauina e le Komiti, o lo o faagaioi le faalapotopotoga i luga o tupe aitalafu e aunoa ma se polofiti, e pei foi ona atagia ai i le lipoti a le suetusi. Peitai, e manatu le Komiti i le agai i luma, e ono mafai e le

faalapotopotoga ona sailia ana tupe faasili e ala lea i atinae ua toe amataina faapea le tulaga i poloketi talafeagai e mafai ona fuafuaina aemaise le lava o fanua e lisiina atu mo le faaaogaina.

2.4 Itu Mataituina:

1. Itu tãua na Mataituina e le Komiti.

Matauina e le Komiti le iai o nisi o pisinisi faapea nuu ma afioaga o lo o nofo aitalafu i le faalapotopotoga i le tulaga o lisi o fanua ua faamatuuina atu mo le faaaogaina. Faailoa e le faalapotopotoga o lo o faatino lava lo latou pitoplaau i le logoina ma le faailoaina o aitalafu i ai latou o lo o faaaogaina ia fanua, peitai e faamaeaina le tausaga o lo o iloiloina e lei mafai ona totogiina atu ia aitalafu. E manatu le Komiti, e ao ona silasila le faalapotopotoga i se auala e mafai ai ona faamalosia le aoina o ia aitalafu ina ia fesoasoani i ana tupe maua aemaise lona atinaeina.

Fesiligia e le Komiti le tulaga o lo o iai fanua i Mulifanua o lo o fesagai ma le malaevaalele i Faleolo ma sa faailoa mai e le Faalapotopotoga o lo o talia se faaiuga mai le Kapeneta ona o nisi o feteenaiga sa iai ma afioaga o lo o tuaoi, ae o lo o vaaia le tele o talosaga mai le afaipisinisi o lo o tuuina atu mo ia fanua aua le lisina mo le faaaogaina. **E talitonu le Komiti, o se tasi lea o alagatupe mauiua o le a fesoasoani tele i le faalapotopotoga mo ana tupe maua i le lumanai.** O le lisiina atu foi o ia fanua mo le amata atinaeina, o le a ogatasi lea ma fuafuaga faataatitia a le Malo mo le toe faaleleia o le malaevaalele faavaomalo i Faleolo, o le uafu i Mulifanua, ae faapea le atiaeina o le taulaga. I le vaai mamao, o se faiga o le a le gata e atiae ai pisinisi ma maua ai avanoa faigaluega mo le mamalu o le atunuu, ae o le a faamanuiaina ai le faalapotopotoga i le tulaga o ana tupe maua mai le lisiina atu o ia fanua.

Fesiligia foi e le Komiti le tulaga o tupe faaaoga e le Komiti Faatonu a le faalapotopotoga ona o lo o matauina le siitia ai o tupe alu i Faatonu faapea ma o latou totogi i le tausaga o lo o iloiloina. Faailoa e le Faalapotopotoga o ia aofaiga o lo o aofia ai ma polokalame faatino (workshop) a le faalapotopotoga i tua o afioaga, o asiasiga ma fonotaga a soakomiti o lisi ma poloketi sa faagasolo i totonu o le tausaga o lo o iloiloina. O se tasi o suiga ua iai nei mo le tuutiitia ai o tupe faaalu, o le tauaveina lea e le Pule Sili o feutagaiga ma afioaga e pei ona feagai ai ma le Komiti Faatino i tausaga ua mavae.

Sa faatalanoa foi e le Komiti ma le faalapotopotoga le tulaga o fanua o lo o nofoia e le afioaga o Fuailoloo (63 eka) ma Satuimalufilufi (45 eka) lea sa amata lisiina e nei afioaga i le tausaga 1974 seia faaleaogaina i le tausaga 1997. Faailoa e le faalapotopotoga, o se tasi lea o faafitauli tau fanua ua leva ona feagai pea ma le faalapotopotoga faapea foi i nei afioaga ma o se tulaga e ao lava ona faia iai se fofo ona ua tele tausaga o taumafai mai. Ta'ua e le faalapotopotoga o lo o faagasolo pea feutagaiga ma nei afioaga i le fetuunaiga o se tau talafeagai mo ia fanua. **E fautuaina e le Komiti le faalapotopotoga ina ia vave faatino sana faaiuga talafeagai mo ia fanua ina ia mafai ona foia lea faafitauli ma vave faagasolo fuafuaga faataatitia a le faalapotopotoga mo nisi ana polokalame o fuafuaina.**

2. Asiasiga a le Komiti

Na asia e le Komiti le Faalapotopotoga ma molimauina ai le tulaga o lo o iai ana atinae ma fuafuaga i le lumanai, faatasi ai ma le asia o fanua o lo o nofoia e afioaga o Fuailoloo ma Satuimalufilfui.

2.1 Atina'e

Na molimauina e le Komiti le faaauauina o le aoaina o le popo ma e tusa ma le 100,000 popo o lo o mafai ona aoaina i le masina. Faailoaina e le Faalapotopotoga o lo o iai le poloketi o fuafuaina nei mo le faaaogaina ai o le popo mo le suauu ua ta'ua o le *virgin oil* ma o se tasi o poloketi o lo o faamauina le lelei o ona tulaga tau maketi i totonu o Ausetalia. Faamauina e le Komiti le toe totona ai o niu fou faapea ma le koko lea sa faatinoina i totonu o le tausaga 2012 ma sa molimauina ai le sologa lelei o le tulaga o lo o iai ia faatoaga.

Na asia foi e le Komiti le faatoaga o le vanila lea e tusa ma le 10 eka le telē o le eleele o lo o faaaogaina ai. Matauina le sologa lelei o lea atinae e pei foi ona molimauina ua amata ona fuga mai ma o le a selesele le faalapotopotoga i lea atinae i se taimi lata mai. Faailoa e le Faalapotopotoga o se tasi lea o laau toto o lo o tupe lelei i maketi i fafo ma e iai le manatu maualuga o le a tele se fesoasoani a le faalapotopotoga e maua mai i lea atinae i le taimi o le seleselega. Fautuaina e le Komiti le faalapotopotoga ina ia toe silasila i le faaopopoina o nisi eleele (50 – 100 eka) mo lea atinae ina ia mautinoa le lava o fua o le faaeleelega mo le maketi aemaise se faasiliga mo ana tupe maua. Faailoaina e le Faalapotopotoga o lo o iai se fuafuaga alualu mamao a le Faalapotopotoga mo le faaopopoina o le faatoaga o le vanila, peitai mo le taimi nei, o lo o talia se lipoti e uiga i le laau o le Pafiki ona o lo o faaaogaina e faasosolo ai le vanila. Faaalia e le Faalapotopotoga o lo o iai se fuafuaga mo le toe faaaogaina o le laau o le lusina (*lucena*) mo le faasosoloina ai o le vanila ona o le vaivai o le laau o le pafiki e pei ona faaaogaina nei.

O le tasi vaega taua na mataituina e le Komiti, o le tulaga i le aufaigaluega a le faalapotopotoga. E manatu le Komiti, e le lava le aufaigaluega mo le faatinoina o galuega ma atinae o lo o faagasolo nei a le faalapotopotoga ma e iai le manaoga mo ni masini e mafai ona faafaigofieina ai galuega a le aufaigaluega.

2.2 Fanua (Fuailoloo ma Satuimalufilfui)

Na asia e le Komiti fanua e pei ona talosagaina e Afioaga o Fuailoloo ma Satuimalufilfui lea na faamauina o se tasi o faaaitaui tau fanua ua leva tausaga o feagai pea ma le faalapotopotoga. Faamauina e le Komiti le tele o aiga o lo o nofoia nei eleele ma sa molimauina ua mautu fale ma aiga i nei fanua e aofia ai ma Malumalu faapea ma Aoga. E manatu le Komiti, e ao ona silasila ma le totoa le malo i lea tulaga pe le ua alagataua ona tuuina atu loa ia fanua e lisi umia saoloto mo ia afioaga.

2.3 Mataupu Lautele

I le faagasolo ai o iloiloga a le Komiti na matauina ai le manaoga mo se fesoasoani tau tupe e faagaioi ai le Faalapotopotoga ma lagolago ai i ana atinae mo le taimi nei ona e pei ona faamauina, o lo o faagaioi le faalapotopotoga i tupe aitalafu e aunoa ma se polofiti. Faailoa e le Faalapotopotoga o lo o iai se fuafuaga mo le tuufaatasiaina o fanua uma o lo o i le Faalapotopotoga, o le Matagaluega o Punaoa Faalenatura ma le Siosiomaga faapea ma le Faalapotopotoga o Eleele Tumaoti o Samoa (SLC) i lalo o se faamalumaluga e tasi, ma e

manatu o sea faiga ina ia maua se fesoasoani tau tupe mo le faalapotopotoga mo ana atinae i le lumanai. E manatu le Komiti, e ao ona toe silasila lelei le malo i lea tulaga ona o lo o manino le eseese o manulauti o ia Faalapotopotoga (STEC & SLC) ma le Matagaluega (MNRE) ma e ono iai se feteenaiga i galuega tauave ona o lea fetuunaiga.

4. MOLIMAU:

Na tapa foi e le Komiti le fesoasoani a le Faalapotopotoga ao faagasolo ana iloiloga.

Faalapotopotoga o Esetete Tausi a Samoa:

1. Patea M Setefano - Pule Sili
2. Tavui Lalotoa - Pule, Vaega o Auaunaga Lautele

5. PEPA SA ILOILOINA:

- P.P.2015/2016 Nu.29, Lipoti Faaletausaga Iona 51 a le Faalapotopotoga o Esetete Tausi a Samoa mo le tausaga faaletupe na faaiuina Aso 30 Iuni 2013.

6. **SAINI A LE KOMITI:**

Afioga Hon LEAYPEPE Toleafoa Apulu Faafisi.
TAITAFONO.

Afioga MAUALAIVAO Pat Ah Him
SUI TAITAFONO

Afioga AFUALO Wood Uti Salele
SUI USUFONO

Afioga TIALAVEA Fea Tionisio Seigafo
SUI USUFONO.

Afioga Hon AEAU Peniamina Leavaiseeta
SUI USUFONO.

Tofa FAIMALOTOA Kika Stowers
SUI USUFONO.

Tofa AVEAU Tuala Lepale Niko Palamo
SUI USUFONO.